

養
一
齋
詩
集

養一齋詩集目錄

卷一

四言詩三首

五言古詩三十六首

卷二

七言古詩二十七首

卷三

五言律詩三十八首

五言絕句十一首

卷四

七言律詩七十一首

卷五

七言絕句一百四十三首

卷六

別集文二首詩四十一首

附唱和詩文二十一首

卷七

詩餘十一闋

卷八

補遺

右養一齋詩集八卷武進李申耆先生著今秋七月既以先生之文集印成帙於是夏君永曦焯如就同學諸子所鈔詩本分體編成見示會周君唐士虞夏返自維揚益加蒐求補所未備薛君子選子衡復從而校理之俾承鉅與黃君仲孫仍視排印附於文集之後先生博極於學深造以道言必有物隨感而發於文有然於詩亦無不然故不特

於倫紀民物致忠愛之纏綿卽小小題咏亦自理
趣盎然流溢楮墨未容以尋常吟風弄月視之也
茲稿大都作自近年且多牽率酬應之篇固未足
盡盛美之觀矣嗚呼先生篇什之富十倍於斯顧
以手稿旣脫不自存省門弟子各秘所藏未及會
合今之所纂皆本江陰蓋由江陰學師劉箴山先
生與先生交最莫逆無間死生屹揚風雅有自來
焉而此邦士氣之厚要有可見然則羣弟子各抱
殘遺庶幾惠然肯來各思景附於高義固歧而望

之已道光二十三年癸卯立冬後十日高承鈺識

養一齋詩集卷第一

武進李兆洛

四言

閭巷屬吳冠英寫照而屬予名其圖予戲應之曰
蔓難圖閭巷曰唯唯名以除蔓蓋閭巷方治本
草將刪去蕪翳而復本初也圖成屬予爲之詩
我行中唐蕪穢無算紛紜交縈動輒羈絆呼童手鏟爲
我一辨面目斯出蛙黽皆竄顧語兩童汝視無亂佳惡
乃判汝力無憚根株乃斷汝意無玩恐其得半汝心無

牽防其善眩惟蔓難圖故圖其蔓圖之不盡覆出爲難
嗚呼人世文字滋患安得薤氏施其快腕一朝廓闢俯
仰清晏軒皇始造百毒俱嘗岐伯致精想其劬勩後之
粗工妄爲簸揚挾厥真意庶幾重光王塗載砥民生平
康

收盦某君配沈宜人繡花鳥成對幅爲其君舅繩
齋先生壽宜人沒後令子焜裝池以爲傳寶屬
予識之

穆穆德門祁祁釐女門子循陔女士弄杼屑玉聲膳寒

秀澗驚代圖絲縷傳芳錦心春乃在指針亦有神麗含
湛露穠舒彩雲精模婉愉巧回造化愛日流暄萬花承
綽纖纖素手窈窕清思黃絹幼婦有逾好辭花花接附
葉葉垂腴實此誦芬千齡不渝

錢鑒遠遺照

意行自適蕭然閒雲山氣鮮翠襍色繽紛手持紫芝顧
弄幼孫敬奉一筐天英日新佳哉小阮此圖君從子所
畫肖貌取神生氣遠出著手成春思之雖遠卽之若親
見似目瞿貽厥後人

五古

史忠正家書手跡墨刻

國破遑問家仁成敢辭死扶顛權不屬多壘誰之耻可
憐一邱貉殉以獨角腐黥墨已化碧百世見君子

嘉慶甲戌三月得剝蝕晉甄其文足資考覽製硯

作詩以諗左杏莊

茲郡古下蔡山水天險巖自昔遭世屯往往尋戈矛城
成錯衆星舊址埋榛萊此磚紀泰始晉武吞吳時陳騫
與王渾相繼守邊陲想其逞雄據埔塹紛我巍浮雲一

俯仰去我千年餘遺烈賴有此泥土亦復奇今時器若
歲金石無貞姿尙哉古之人搏埴能爾爲况乎古人心
久之固不虧攻治儷書策古光同照眉豈無荆山璆熟
媚非我思

貽子常

賈傳始弱冠終軍亦妙年吾今已過之偃蹇行自憐非
怨遇合遲吾學實未全道高身自尊進退非徒然

李杜二公像

太白真達者忼慨負經綸風塵識子儀奇偉固罕倫瀟

灑動至尊宮宦不敢伸抗歌古梁甫韜意惟飲醇子美
乃志士稷契思致身側身亂離中眷眷不忘君低頭拜
杜鵑大義孰與陳所至陳殷憂尋常淚沾巾兩賢展所
志房魏斯其鄰立言有本末道與風雅親吁嗟千載下
奉以爲詩人

爲何明府竹薌題村居讀書圖

道心筦萬化學海宗衆流自來幹濟才惟向詩書求而
况仕優學不作鯁生鯁開抱納名物矢謨裨黠旒居寵
念入畏後樂當先憂明府偉志業世澤承清修一鳴高

岡鳳載驅卑父騶飾吏盛經術導窾無全牛劬勞束官
鞅偃仰懷舊邱良繪遶荆關樂意綿春秋豈伊賦招隱
豈伊倦行休諸葛南陽舍希文長白遊小年益所集今
日效所收憤樂結中腸寤宿常勾畱乃者辱眎睵授簡
令銘幽惟尊先大夫純蘊高風猷聚書三萬卷大義勤
研搜適幾用無滯貞賤藏以周是其彌綸功詎與咕嗶
侔嗣緒式彝訓恢耀益炳彪諸公盛文藻珠玉方交投
竊伸臺萊思擇言曷敢墮下走耕東臯爨虛食不謀亦
有半畝園草宅那得抽枯茹遑自計蕭條盈輩儔幸因

容隙光回彼羲和軌卉木感春至綿羽亦有鳩當攀河
陽花擊轅陳吳謳

桐城吳貞女

五教稟天紀大義一以繫致身與久要豈以男女別古
聖重抑陰原情取通脫守死以養道於婦不深責祇求
便庸愚非曰律賢哲能揆心所安義起禮所揭含章筮
可貞代終補天缺煌煌著爻繫此誼誰剔抉偉哉貞女
行卓然姬姜臬慷慨期赴義從容蹈安節此身未分明
此志自堅決七年何遲遲百鍊見神鐵姑衰悼喪子有

女親可悅夫殤本無兒有女祀無絕生死兩不負苦樂
百無缺宜尼存栢舟千載爲嗚咽端拜展此卷春日北
風烈大地倏曠曠彌空舞陰雪窻前數竿竹戛戛自磨
切冷然疎梅香坐令心神徹

李心陔疲於津梁圖

天涯渺難卽吾意其蹉跎江上無芙蓉攀裳竟云何吾
子好筋骨卅載歷坎坷陸豈無虎狼水豈無蛟鼉行行
爲誰驅萬里俯仰過詎云恃忠信遂可輕風波放杖得
小休陶然契天和託宿在何許前途尙陂陀造物勞以

生未死敢有他息陰諒非遠逝者亦已多仰視滄浪天
效彼勞者歌努力爲我起斯路幸不訛甘受田父笑毋
爲僕夫阿請借雙行滕以爲安樂窩

德明府以題孫虔禮書景福殿賦真蹟詩見示次

原韻

藝極猶懸權識貿或幹鼎要能天際翔庶不鼠穴騁章
草篆之出阡陌破邱井崔張趨簡易綿密轉清迥右軍
守恬暢如水淡彌永大令擢飛騰翼翼駕項領雙源遂
分導百旒揭一準文皇負真氣縱送剗寬緊兀冪屏風

書想見龍德靜咄哉孫虔禮驂駢一何猛書譜入大王
區埒辨町町瘤墮但針腦蚤正必視綆茲賦追阿敬推
陳更標穎一掃旭兼素重覩芝與靖鑄之瑤琳珍長與
奎壁耿苟非洞見垣何怪礫揉礪肘腕論回旋走也謝
不敏赧然矢盡各率爾子何陋

酬季仙九觴荷詩次韻

惟頗嗜佳句而苦不善詩又手乞一聯與否難可期假
寵於名花此計良亦奇鑿沼數十弓蒔花千百枝豐柔
健仔骨冰雪姑射肌有如江瑤柱聞者皆朵頤履舄交

衆寶剝啄遑云疲寤寐彼澤陂溯洄伊人湄往往倒載
歸不異習氏池如此三年來詩境常修治卽事且爲樂
念往多參差前年十二客各各神仙姿詩牌門先構觴
政任所施去年舉斯爵忽忽神不怡喬公遽凋謝腹痛
酌空卮宜興大小劉分地幾并蓁蕭家好兄弟巫雲勞
夢思所幸祝次公躔得同翺翹今年舉斯爵茫茫意無
涯傷哉同心人草堂彼一時計載如且暮已矣能勿悲
黃公以學仕試可尙未期畱者僅吾子苦苦訴將離踈
烏剎那間聚散焉取斯明年一樽酒知復誰與持賤子

成蔭落資老固有宜吾子凌晨葩努力耀朝曦窮愁不
爲病且借詩酒醫偏師幸尋盟聊願屬犍隨君嫌蟻封
窄廣場樹鼓旂組練四百士介馬滿長馳此皆一當十
大敵安敢欺吳宮教戰女爭從壁上窺赤幘揜廣袖翠
翫麾明漪颯爽來助戰瑟瑟生秋颼何異鄒魯圍三北
其奚辭乞降諒不納獻此忸怩詞礮礮成或歛回谿翅
終垂賀錢旣已入杯來亦不遲所餘風鶴驚屋角叫鷺
鷗

雲海浣衣圖爲莊卿珊題

我昔登九華夜宿東巖巔是時歲丙子正月方初旬萬
物咸閉蟄殘雪晴斑斑侵晨披衣起乃覺世界翻不辨
身所在眼際無涯垠側聽地底下啾啾人語喧須臾識
高阜乍吐東方曦絕訝歷陽都夜半平沈淪極望了無
覩但見波粼粼金碧露遙岫彷彿海上山撼搖勢疑動
變幻如有神回看此岩後萬壑何甦甦蒼翠淨松竹窮
縹分入煙方怪左右顧咫尺殊地天瞥見一縷白遠從
林隙穿其細若絲髮徐裊類曳牽轉瞬成汪洋山谷浩
漫漫溢溢直上出尖凌茲岩端前雲亦騰踴回互相通

連頓然陷虛空此身爲飛仙口鼻入靈氣肺腑皆氤氲
但苦衣襤濕清冷思負暄却想天臺峯峯畢處最尊下
若往尋之冥行窮躋攀寸步不可辨牽手如飲猿拄杖
已屢卓投足猶逡巡時臨百丈崖耳中聞潺潺旁有瀑
泉落僵凍撐如銀目眴股震掉一墜愁難展數轉勢彌
峻石梯鐫青岷陡上且千級力盡始少蹲倏爾天風來
驟見曠宇分諸峯出鬢髻漂散鳬鷺羣風回氣旋合昭
昭復昏昏前行更久之豁若離籠樊來徑不可覓已在
天臺前置身鴻濛表揮斥八極旋九州及四海自古何

茫然呼吸接帝座下界空嬰纏此行誠超奇往往勞夢
寃今朝展斯圖大笑敦夙歡君遊是何許有此世外緣
意似畏沾濡竝立裳屢褰沾濡正不惡洗盡紅縹塵人
海常苦辛宦海常苦屯茲惟光明海澡浴一任君至道
無視聽入於杳冥門離形御六氣洗心歸渾沌霄路有
煩累願海無迷津吾方期雲將攜手登崑崙

題趙烈女傳後烈女將嫁聞夫墜水死卽投井以
殉而其夫實未死也

柔情微如絲急之那不斷柔情紛如絲夢之那不亂區

區抱冰玉一往絕顧算矯矯貫金石千秋想崖岸此事
禮所無此志聖所嘆鮑焦無從容魯連乃深贊從來宛
轉字釀盡鄙夫案

性初汪君以生壙圖屬題時正爲亡兄營葬事在
原之痛觸此彌深稱心而言語不能擇

五倫有真樂最樂乃兄弟疴癢非殊身呼吸歸一抵小
時鈞笑啼長更通聽視妻孥雖云好究與性真詭朋友
雖云密淄澠各一水何如華與跼生理內相倚汪君示
此圖披圖讀君記未半神內傷終篇雪如涕賤子有哲

兄愛弟入骨髓晝讀常連床夜卧每同被甘美不獨御
衣裳必均製旬月不相見往往入夢寐中年困人事別
輒曠年歲晚乃得聚首顧景惟恐墜從容爲弟言百年
諒非易爲歡幾何時轉瞬死將至生時苦歡促死或絕
移徙當與汝同穴終古並肩臂賤子笑而答此恐乖古
禮不若擇閒敞相比作幽竊咫尺聯簷楹朝夕成晤對
所願未及營阿兄遽捐棄遺言猶在耳此約那得遂敬
當奉遺骸及早安蒿里先坐有餘壤穿隧耐祖禰死者
如有知此恨詎云弭生者雖未死生日亦短矣茫茫視

前途切切負芒刺君懷何磊落君計復深至便將身後
圖徂作目前事俯仰卽陳迹得此且快意期君果此緣
雪我銜骨耻感此心忉忉出語忘忌諱知君弗嗔怪君
意固爾爾

送吳碩甫之官寧羌

蓐收已挈令祝融撓其司熇熇出盾日頊頊逃傅箕庭
階大火聚几席成熾炊氣出不可內膚熸旋欲糜宵晝
劇展轉手足無所施似聞藐姑射乃有神人居一任金
石流不爍冰雪肌我今便欲往安得鸞輪馳君子鐵石

骨隨遇能透迤置之洪爐中百煉要不移造冰自有術
懲羹徒爾爲小官亦油油柳下誰云卑征車一以駕乃
至漢沔湄送子烈日中念子嚴霜時寒暑諒無改弦望
難可期詩成山月吐瑟瑟生涼颺恍如故人來慰我須
臾思

德西礪明府貽詩題曰酷熱才來宜攝心待之次

韻奉酬

外物恆河沙我心乃列肆加以耳鼻口招彼色香味說
寒膚已栗說熱腸先沸不求息陰處但祝白日墜是名

苦中苦求遂無一遂今我與心約無與外物比我心本
非有彼技安所試假如虛空中豈畏百爐熾繪風固小
術造冰亦鈍置炎涼及苦樂并之置一器到處絕沾着
所向皆吉利便蹈大火聚焦灼永不被得全而全存不
傷非善避法王法如是諸法皆紛粹荀子儒效篇注粹
與粹同

滇海南歸圖爲德明府題

身世晦今昔勞結闕天誠契契念明發駸駸感斯征萬
里豈不遙况乃辭幃幘棧飯登頓亟水宿風潮并齒至

尹環列宮版固有經茹泣別燕寢靡盬趨王程十載羽
林郎黽勉影朱纓愛日敦詩書丁時奮翔鳴滔滔迅波
逝疊疊逾歲滿致粟乖負米奉幃空專城圖畫改顏色
涕淚爲縱橫運往詎堪把時來意彌振側聞先將軍風
義冠萬英戎凱殺敵果師中丈人貞慮變有元理幾克
無智名力紆未酬志嗣緒記有成使君久滯留冲襟詎
爲盈百里亦朝寄一經惟政衡涉世如遵途夷險非力
爭端凜跬步訓未畏卻足行滇山高曷極洱海廣且清
庶幾廸前光補勒天柱銘

陶雲汀中丞海運圖

神瀛在天地秘米在太倉以此維正供役彼百谷王衙
尾千百艘逐一鳧雁翔直抵析木津疾若天船行天吳
粲然笑羞彼淮與黃前事得龜鑑涉險嗤鼉梁

帝德侔造化

王路窮梯航籌海資勞臣擘畫周且詳非徒天儲供及
時成浩穰非徒河隄使藉可力濬防東南民力竭司牧
多孔瘡嗷嘈樓船聲叫噪未渠央藉茲暫息肩徐與平
料量壯哉洵遠遊通變乃久長高臺矗海漚翹首極混

茫此時勞臣心遠與雲帆將

題葉兩垞詩冊

亢宗自署考次山春陵行驅鱷韓潮州化梟仇蒲亭言
語所流露皆載真精誠坐令千禩下俯仰懷英名使君
繼高軌綰符下蓬瀛幾年宜春宰再歷宜安令百里聊
小試淵險皆爲平風猷夙標映翰墨紛瓊瓊吾民會有
福換縣來江城江城漸凋瘵振起資神明鄭僑念寬難
楚滿箴勤生大均善更化適變能以經讀公卷中筆豈
弟流心聲窺公太和抱父母在我庭惠孚置郵速期月

知政成扶攜聽謠頌泚筆猶能賡

江陰別康生竹吾

別思不可任況終一星久吾衰復何云子壯幸無負展
采旣陳力克家亦肯構勤勤懷苦心抑抑若畏咎轉盼
黃閣開夫豈白屋偶諒知蓄積素詎待壩篋誘私懷抱
縷縷陳義竊貿貿善始在不滿篤終貴有守周防慎其
獨輔仁取諸友出入使知懼福祿所從受茲焉懷永圖
歲月不可狃

嗜好盡無益藉以悅我生悅之惟無涯反足盪其情走

也苦多好并力常兼營仰思捫列宿俯欲周裨瀛遠乃
極蒼籀近亦搜岩坑日力旣已耗用財尤無經因之困
紆籌左右艱支撐事後豈不悔故智苦易萌小物亦累
德微塵能蔽明惕然此自訟逝將安吾精君子善推類
庶幾絕纏撓

閒多一身慵衰至百味淡祇覺事多廢所幸飯能啗一
種吾菟裘取足不得儉名花向人乞野卉隨地擲縱橫
蔓綠繁仄塞寸紅艷天情燥濕占物性肥瘠驗屏巒窺
墻張鏡沼俯檻瞰忘適乃其適歸休亦何憾往者勵勤

志我針而與砭荏苒付埃壒何物足點勘此會誠可欣
茲別恐非暫

暫別亦何爲江湖渺前期茫茫百端集惻惻兩心知把
臂畱幾日開懷如閱時寄情松石間我意亦爾爲此願
豈難遂何日果副之奔走近世事偃息甘牽羈加餐與
崇德不足爲我辭護子玉顏色貯以金頗黎晨薰都梁
香夕斟翡翠卮常常却災厄久久逾華滋接手太清上
鴻蒙與翱翔

題陳笠漁五溪遊稿

遠適念明發端憂展遐賞殊鄉詎云美涉樂彌以愴君
子逝衡嶠嶺渚修且廣登頓困投策沿洄聽鳴榜厓窺
每攀組水宿或穿莽階天出濇沈躋地覺忽恍星辰如
欲捫忠信不可仗蠻徼辨盤瓠叢笑錯矻舛深宵交虺
蜴白晝恣罔兩諒無區中歡未辜物外想辛苦訴危柱
勞歌動塵鞅偪澁幽興溢艱難道心長遙吟韻林筵清
嘯答谷響削鑠疑有神觀化若示掌荃芷時一逢踟躇
慰孤往況以庭闈趨鄂韓復競爽銜思有離合卽事多
慨慷蕭蕭緒風中落落碧雲上紛茲璆琳陳頗媿鐘鼓

響周旋奉副墨盈手素輝朗

倦游篇爲家心咳後來題畫

天涯渺難卽吾意其蹉跎江上無芙蓉蹇裳意云何吾
子好筋骨廿載歷坎坷陸豈無虎狼水豈無蛟鼉行行
爲誰驅萬里俯仰過詎云恃忠信遂可輕風波倚杖得
小休陶然契天和託宿在何許前途尙坡陀造物勞以
生未死敢有他息陰諒非遠逝者亦已多仰視滄浪天
效彼勞者歌努力爲我起斯路幸不訛甘受田父笑毋
爲僕夫呵請借雙行滕以爲安樂窩

休復居圖爲毛生甫作

前水非後水古今相續流
今人非古人一逝歸山邱
形影永不接心魂誰與收
眇焉託豪素來往通綢繆
水味別淄澠人品殊剛柔
所嗜復乖方何以相獻酬
之子信民秀造道能優優
衷藝必一致通識資旁蒐
遵途守大雅枝葉皆毗劉
長流指溟渤淖潦歎浮漚
豈伊異趨操自本固不謀
相與抱微尙黽勉敦古修

晨興俯廣池露下清且瀾
芙蓉坐銷歇秋慮淡如此
愴然懷遠人
人遠室不邇
褰裳云未遑
寤語勞虛擬斯文

盛軌闢循之有本始正僞分較然傳緒瞭可紀指畫得
師承繼武望吾子命世亮有才胡爲久泥滓元黃謬儼
目鍾呂諧里耳閨中旣遠遠誰爲蹇脩理登高望四荒
慷慨忽不止途長夢不飛吾衰已久矣

咏梅示蔣生丹稜

飛雪浩千里歛畱空林端歲晏能華予私心爲磐桓茲
花幹時運造物忘其權抱氣豈不鬱有力足自完爛然
盛文章璀璨若玉觴冠覲髮咸毗劉熱累疇嬰于青琅以
爲實祇守木德酸調羹焉可望邊計身委盤及此芳菲

節相見常餘歡悶求醒心香飢當嚼冰餐人生幾花開
慷慨成長嘆於天矢無負努力保歲寒

左葵之走馬長安圖

葵之抱葵心心爲傾陽紆枝葉成峻茂神理少華腴梁
廡一相見執手心肝輸爲言承素業忠毅舊門廬先君
困禮闈齋志歸黃壚誓當奮功名繼志斯不辜言寄邁
征志繪此走馬圖兄弟若驂靳後先取令譽賤子贈一
言君志真勤劬竊聞古賢哲揚顯非馳驅努力葆天爵
致身於天衢行已自有道不在長安途慥慥乃君子庸

庸非丈夫特以完初心亦可酬時需令名有終始令嗣
垂無渝以此廣君意散鬱聊爲娛賤子日蹢躅徂影駸
桑榆再見不可期私愛盡區區

鄧完白刻印詩

嘉慶庚辰守之從余游粵東一日出其匣中所
藏先人完白山人刻印四方見貽予不覺狂喜
遂銘之以詩

刻印莫如漢刻者云誰何有唐吾家冰持論始有科至
元吾子行乃以精善諱明代不乏人文何揚其波櫟園

印人傳屈指一以多好尙各殊異臧否隨成虧大抵斯
藝貴原本篆籀塗六書得其理點畫咸可儀使鐵如使
毫所向無不宜當時漢魏人小學常不訛李吾文何輩
一一通蟲蚪蹙大使之小所以能爾爲鄧翁負絕學追
冰而及斯游心入渺冥隨手出變化餘力作狡獪頑石
遭皇媧神趣在寰外阡陌初非奇頗恐後來者此道無
復過觸目欣所遇旦夕聊摩抄

陳雲乃司馬督運餞行圖

將漕非泛差飲餞古嘉會從容接杯酒慷慨陳大義繪

圖鄭俠心憂國祭遵志謂少穆中丞芝捐方伯杜老懷
結輩下走亦云爾使君足經綸盡臣眷優異尋常投贈
中重此民生繫方今漕事急上下乃交弊官且不聊生
斯民可知矣皆云由運丁憚之不知止丁亦前致詞出
反固一理有人扼我吭取之甚於寄各自恤所底小人
敢放利此咎無所歸民窮忍坐視極重實難反止沸豈
無計使君廊廟才不日立殿陛謨堪造膝陳語不批鱗
忌九功皆可歌發軔定於是

次韻酬蔣適園

華頂洗頭盆船藕隨所植移之置潢沼無乃衰鳳德紛
紜厠芟兼俯仰常默默有時發華耀似爲悅已飾清風
欣晤對赤日謝遐陟松榆傍作圍蜻蜓繞如織雖非招
涼館或謂華胥域慨然念前賢使我面欲絕此院何年
構彬雅集子墨擇地經屢徙規置事孔棘吾師首登座
抱經先生高文鬱華國藝圃拓藩籬荃蕙羅閭闕披華
何彼穠啟秀苑其特至今花木記油然出顏色下走忝
後塵黽勉守遺則棟宇幸繕完琴書時拂拭穿徑出南
塹結茅倚牆側種樹豈所長物理稍能識所冀旦夕勤

峻茂如我臆養花沃其根養果去其蝕原泉能混混涓
汴自湜湜凡茲覆露功實賴邦賢力竭來三四年人事
愴追憶老成幾徂喪士類罔不盡楊政樵祝櫻髯子常
諸君先生今碩果遺種視含薏稼但力穠蓁穫豈問豐
瘠門牆盛桃李一一仰封植投我錦字詩深愧無鹽刻
羣率答嘉藻神氣在離卽有如東家施掩袖畏花逼

題常熟趙閭鄉孝廉允懷遺照

昔歲得奉手去臘周旋再方喜高山仰俄然悲逝水雖
瞻遺挂存亦已少壯改驚見小於菟悄焉接丰采

玉汝趙君以所藏欹器繪圖見示並序其傳守之

詳爲賦此詩

道家出史官作鑒閱興廢一嘆而四益卑弱遠祇悔尙
象感屈伸銖兩辨進退特懸傾欹形妙作中理繪側若
鐘在虞含響待撞搗又似人循墻偃俯但見背坎流科
不盈人滿天所概顛趾分之過節腹永无癆摩抄桓官
藏宜尼爲深喟珍隨泗鼎淪製賴征南再斯器傳有緒
云自天水代宜仁褒忠碩獻簡拜天賚浮沉積歲年傳
寶經幾輩君家故王孫歸與弓玉類乃祖明讜賢嶽立

歷朝棠鰈鰈銘兒觥舌昨批藪態文孫復羅此淳古雅
克配模雖傳范成道固典型在徂基肅紉紉酌潦謹濯
漑有尙心孚亨不敗德積載庶幾目爲瞿明發見諸優
識字別籀古箋證吾未逮

海棠對酒圖

道光三年三月十五日辨志書塾海棠梨盛開
時尹言趙君以課兄孫嶽生住塾中張君懷白
亦以覓侶見過與同住予東西浪遊視家如客
不見此花之開者十有八年矣小雨時作冶紅

盈盈清譚未疲欣然命酌飲不及醉爲歡有餘
懷白乃繪斯圖志之尹言持盃坐案右予兄五
初對之坐嶽生捧壺侍尹言後懷白坐尹言之
次予方徘徊花下子願捧觴趨而前一童子僂
而進果檟袁二也一童子坐地窺罍孫大也諸
人無前期無招邀取諸目前俯仰自足懷白不
求工不致飾率爾涉筆神明自超蓋皆興會所
至天真應之者也夫家庭之衍樂友朋之會集
時節之令草木之繁當其暇時開襟取暢此豈

人世間不可得之事然或一歲中數數有之或數歲數十歲而不得一值則屈指前後有不能無慨於中者矣况乎更數歲更數十歲欲展斯圖視顏色有不堪置想者乎爲樂當及時古人
不吾欺也各有所詠聯之爲章

繇雨暢花意油然春滿前五初新紅自融冶細絲相周旋尹言花下拂石几忘言坐相看懷自清賞及茲辰何如桃李園中耆願持盈尊酒長奉百年歡願傾壺未渠央莫放花枝殘獄生

意有未盡復成此篇

看花憶花年花年與吾偶先人所手種及見條似拇小
年吾讀書與花日相守花邊三間屋弟左兄在右花開
卽攀條花落便攜帚兄先燕臺去五載蔽窓牖花亦不
肯開開亦莫之叩比兄歸來日仍復並肩肘各自擁一
壚弟子常八九嘆時爭汲泉開時共携酒坐看繁枝發
轉盼十年久無何弟從官太歲在乙丑一往困纓鞅若
鼠戴簪鉸奉諱纔得歸客授尙奔走今年自誓苦自此
正邱首百歲已逾半日月豈可捃春風正融蠲春雨間

瀏瀏花意亦殊得爲我開笑口憶花初種時一根瘦螻
蚋今來三本並生理轉相受所聞惟讀書所見盡佳友
姿如潛蚪媚顏比使人憫花方及壯盛人已漸老醜膝
前各有孫兄孫美瑩琇仍然向花讀此屋幸不負三復
伊蒿篇涕淚痛紛揉有書數萬卷有田數百畝饘粥甑
可供簡帙不外取薪木無毀傷庭除少塵垢盤中羅宿
脯畦畔剪新韭倚石招嘉賓牽裾速諸舅此樂誰所貽
此福良已厚如此不知止對花忸怩否請借僧繇筆爲
我圖不朽歲歲長相保花前共攜手惟花聞此言持以

爲花壽

題惲南田畫

棲幽構煙藪賞曠轉蒼麓往蹤巖岫重結伴松桂足苔
深石氣古雲靜林光穆淙淙環急湫櫛櫛漱寒玉虛室
生凌兢微風度醺醺紅塵何處無茫然想空谷

江陰縣解湖石次德明府韻

到公睹奇礪米老袖靈石五嶽放眼空一邱所懷特雲
煙良孕精草澤當物色藉守永貞貞豈假繁飾飾使君
標介如履扁方抱式補天工鑪錘疏曲勇跡擘偶回雙

眸青睞此一寸碧近歡星辰捫遠謝屐齒歷道爾餐谷
神頓與羣動息寥天去安排大地等栽植坐愁朱顏凋
亦恐芳草歇瑰詞宜就鐫允以頌如璧

松下小桃花

松下小桃花偃傍何猗旒有如樂天翁樊素爲之侍天
天誠可憐落殊自喜但嗟年齡促不獲保終始修短
各其天宴私夙所鄙紅顏自古多幾輩奉君子所以蕭
生奴耐筓守穎士

養一齋詩集卷第一

養一齋詩集卷第二

武進李兆洛

七古

磚硯爲蕭恭孺作

蕭生小年能作賦
爛若星斗羅心胸
行沙明珠大如月
淮海之產真無雙
此硯沉埋數千載
一旦拂拭開塵容
何况真才有如此
剖蚌作貢非奇逢
故人贈此最光彩
莫嗟曳尾泥塗中

何湘文太守羅浮面壁圖

承南海始得見湘文老前輩于合河中丞節院
畱宿授琴於同學諸子琴罷尊開輒陪言笑出
此命題率爾序述時道光元年四月朔日五星
聚寶壁間逾月餘日也

達摩手提一隻履踏遍閭浮參佛祖無端安壁自障礙
一面十年何自苦賤子飄蓬心頗謂尙平賢偶聞羅浮
佳便到炎海邊要追師雄飲綠萼那作退之尋大顛有
客羅浮山下住攜琴却過珠江渡一彈高山思窅然日
觀雲峯指間遇囊中更出仙山圖紅泉翠磴交盤紆岩

下老衲獨跏趺收卷相爲言彷彿存故吾猶憶少壯年
侍從承明廬烏府赤油管朱轡綠緹車馳驅三十載出
入萬里餘吾生行歸休林壑固足娛以彼止觀法息此
塵勞軀何必斤斤問五嶽無數好山皆奧區青鞋倘肯
從我逝曳杖蠟屐叩當須聆琴讀畫意已暢縱酒劇談
神覺王不是逃禪蕪戶郎竟成入社陶元亮曹溪辛苦
事薰修何似安期汗漫遊碓觜一花開已了蒲根九節
倘堪求郢書更欲爲燕說事業名山待開闢循徽試與
奏雲門昨夜五星方聚壁

文姬歸漢圖步顧廣文侍諉韻

生世可憐惟女子至痛雖生不如死一身胡漢兩難捋
百種悲羞萬無洗流泉水絕長嗚咽只剩心頭餘血熱
漫伴南飛玉塞鴻那堪回首天山雪暫抱琵琶立淺沙
此身歸去屬誰家上陽亦有三千女貼鬢呵花擁絳紗

鄧君完白登岱圖

日觀峯顛置完白人奇境奇兩難得畫之又得羅兩峯
叱石驅雲致不同斯遊奚止四十年我今展圖猶眼前
先生精彩固不敝奮袂盱衡見其概今我老憊復坎坷

行吟一室繭縛窩夜來有夢尙魄磊倚杖黃山看雲海
嗚呼完翁那可再泰山鬼卒今安在獨立遠想成蒼茫
情惻語悄何能長會當尋君還大荒收攬魂魄從雲將

吳越王投水府龍簡刻本

錢塘江頭震鼙鼓文種子胥避强弩氣吞海若一何武
嗟哉此時真尙父山河入手膂力愆中朝四國方睭睭
投簡水府求長年此時暮氣抑可憐人生盛衰那能改
空笑乞靈向真宰力可抗海乃媚湖鑄鑿良金費文彩
祇今滄海生狂瀾裹蹄無數填廬山不須漢武沈美玉

卷一 雜言 九
願得壯士關黃間

黃潛夫話廬圖應毛生甫屬

窮年咕嚕如醅醕發覆喜見經師毛口間
泉流灑秋瀑爲我宿物胸中澆一空氛垢
抉文部流別細辨秋禽毫十年足跡遍揚
粵一時僑胥皆論交爲言叔度特超渺
行不可束言無驚常與貧人共年穀不
會曲徑爭邪蒿結廬何必東山謝高興
聊託柴桑陶柴桑之情形問影柴桑之
話詩存騷斜川渙下恣歷覽丁龐周鄧
相招要我思晤語且未得欲言又苦同
調刁却從老蓑尋故訓

還不謂矣心忉忉

和雲汀中丞二月十七日吳淞江工竣放水作歌

原韻

揚界淮海包江湖錯綜疆畝浮比閭壅卽一川可騰沸
利則萬派安徐趨豐凶苦樂總由此諒哉管子言水樞
河隄使者每失指解絃膠柱昧舉隅朝議或類臧三耳
道謀况載鬼一車前年支祁作無賴穿漕敢遏

天倉租公膺

帝簡特移節百輩刼刼公魚魚海王惕息効將送牽輓

豈必資長渠夾碣遠師神禹智括船立破儒生迂內河
平行小苦滯吳淤泥澱百里餘今年下令急濬滌萬夫
荷鋪聽指呼先時綢繆握成算往事夏海空揚鋪稽經
周史胸若鏡景山度隔躬登墟細參呼吸辨潮性舊設
障間盡掃除帆檣爭湊佑客樂旱潦有備民安居長歌
浩然繪借樂快若央漢盪積淤頓令煙波入想像徑欲
泛艇撈菰鱸鮓生家住北江尾入江渚港殊盈枯中間
孟河最關係爲公前席雍容掄此河自唐迄明代昔通
我舸今乾嶇京江東堵月河塞商舶賴此爲委輸兩厓

之田復高仰一滴水比天漿濡工經久廢事本鉅急思
借

帑計轉愚其西呂城有浦瀆下游相接堪囊梳若通斯
河工較易功成爲利當不殊敬臚芻言乞清燕別白一
是求分區附呈土人鄭良兩言敢方一文以備芻蕘之
採土民望公如望歲香花旦晚迎公輿

梁芷林方伯屬題仿禹鴻臚卜居圖

汀洲幾日過春風新蒲綠篠交龍蒸山光水影兩不辨
眼前一片青濛濛誰人縛茅此中住携幼招朋自來去

短艇橫浮蘋葉灘空罾斜倚垂楊渡當日鴻臚寫此圖
閒身真入畫中無百年粉本爭傳玩幾輩詞人費揣摩
自契天游齊位置江湖魏闕無殊致畫師也落第二機
詹尹何容知此事

次韻酬崧甫

手折疏麻訴荃宰黃河之清那能待願向蜉蝣借羽衣
酒如天漠花如海海邊漚鳥毋寒盟有璧不羨十五城
三萬大千場好醉花亦不老人長生會是排風有毛翮
何必黃山碧溪月不作花王風露郎便爲江上荻蘆客

移來玉井十丈花，擘取赤城千片霞。偶然吟詩傾斗酒，
拈一兩句不成首。蕭蕭廣廷寥寥檐楹閒，招步兵時呼
宣城爭妍盡環燕。列侍皆飛瓊得吾子來，喜難說屈雖
隔屏如同宅。朝看初旭海雲紅，夜踏殘蟾楚煙碧。迨樓
何必董糟邱，醉中自有大九州。灌園何必於陵子，操蚓
廉糟詎爲美。人生行樂但有此，螺贏螟蛉等閒耳。風冷
聊從禦寇遊，霧濃莫入公超市。飲中攜得新詩來，云有
去志心低徊。幾年舊雨愁陰閣，幾日新歡笑口開。幸結
閒緣好，携手莫從駒隙爭。然否他年人鏡新，芙蓉江上

秋風試回首

次韻酬問亭廣文

先生之座七寶粧先生之署寒泉冽謂馮公非我借春
風暫拂花飛來玉屑明于雪先生能詩不能飲斗酒空
爲石才折此花頗濃却道清此官已冷還嫌熱我有蓮
華妙法經酒醺請向先生說

汪桐生猷中采蓀圖

飽聞黃山天下奇此生蠟屐知何時曾登九華看雲海
天都列嶂如蛾眉天上仙靈此灑掃常叱乖龍種瑤草

世人採掇不知名孰起雷公辦莖稟有客探奇說壯遊
一枝一葉簾中收鹿啣鶴啄之所剩斷崖石徑窮冥搜
靈山催放雙柑去畱核蟠桃幾成樹定是前身本謫仙
許灌芳園作瑤圃竭來畦畹竟何如懷夢聲風信有
無無分攜鋤與分種有緣點筆爲題圖卷裡烟雲看不
足可憐下土還塵濁長饒白木且歸來杜老空山刷黃
獨

薛又洲課孫圖

又洲先生負奇氣跌蕩世事雄如文肺肝槎枒出芒角

齒牙慧豔流清芬一朝感遇短簷下廿年橐筆丹楓宸
曼倩詠諧妙天下公卿色動舌若捫厭承明廬求自試
翻然出作髯參軍江濱冷署苦寂寞事或不選熱豈因
不沉不浮又廿載染黑扳白何辛勤一階平進竟得隴
引年笑却巾車巾小年頗似母昭裔借書受侮心斷斷
同知薄祿曾有幾累寸積銖徐摭掄居然插架一萬卷
朝咀暮飫忘其貧歸來買舫與同載盈倉寒艇難容身
三間老屋畧灑掃檢點籤軸先鋪陳小齋自署如執燭
低頭兀兀窮朝昏吾書豈可授庸子兒學已就姑課孫

周旋一室樂復樂謝絕羔雁無紛紜君家清望冠滕牒
累代名德承何紛卽今奇童見頭角轉盼繩武排風雲
展圖自詫還自笑我亦伏案爲寒蚊有孫九歲漸成長
懶不自課求他人芸人舍已固失據調猿御馬愁難馴
尋當從君學師法他日小友誇同門

祝賡颺焚香省過圖

吾聞文靖記過數黑豆又聞趙清獻告天恐負疚君子
之學戒自欺有過無過誰當知自省自訟無已時十手
十日常在茲君子行事世所希損以遠害義勇爲觀君

體胖識心廣豈于爾室留瑕疵蘊賢常恐過未寡遂覺
今是昨尙非開明牕揩淨几購都梁辦沉水朝焚烟青
暮煙紫吾謂非薰直猶耳文靖清獻一瓣香虛室止止
真吉祥

經游擊克勒馬歌次德明府韻

書生騎馬如乘船抱鞢據鐙却復前但聞說馬翻色舞
直欲抵掌談幽燕長白叅軍得克勒于古大宛西海邊
一團黑雲護龍子三花十萬空轟闕時清無事作款段
緩裝騎出驚閩廬坐令使君感髀肉思一蹠蹊騰華韉

又愁徽纆累千里仰首一噴聲造天使君往年驅薄韋
此邦色笑頌乘駟尋常率馬及下走小駟卽戎將渾旋
駿無可守願守跛力有可効當效牽黃金臺高馬今至
中原屬鞬甘執鞭嗚呼少陵老坡賦馬詩句千秋新決
波發電之足入手皆調馴

種壽堂觴菊聯吟頻年爲例今歲酒人星散頗覺
抄歡峻堂索詩率爾成此

金商一昔暄晴昊吹萬刁刁出空竅我上層岩招海濤
直壓天風發長嘯江上鼉鼉晝寂寥山邊草樹秋清峭

興來何處酒杯寬
高閣臨街不須導
尋花未涉徑三條
入座卽看花四照
耀眼深深護錦窠
聞思淡淡叅香窖
渴羌但覺杯來遲
觴政不行飲爭酬
主人誰氏今清門
段干市隱能高蹈
會節千斤通邑鮪
澤文三日南山豹
主人愛花得花意
百甃環階日巡徼
主人愛客盡客歡
侵曉筵開夜燈燒
主人愛花如愛客
登諸高堂薦嘉號
主人愛客如愛花
消息尊壘劑寒煥
我住江干已四年
花發年年折簡召
招攜朋侶皆酒徒
不幘不巾皆徑造
今年小覺飲興減
酒半停樽自商較
子丹佳人談壘壘

鬼唱秋墳螻蛄吊芝亭喬公七十誇矍鑠遽挹浮邱逼

松嶠雲客廣文蕭生兄弟玉樹行江漢波長雁聲嘹子

清子若陽羨溪頭大小劉出處雖殊各無耗彭甫春江

祝翁當筵最神王危危玉山每先倒無端鶴病成癡癡

人血難求孰爲療子常回頭舊雨已如此屈指晨星更

難料黃公芝盡甘冷官計日門前倚征櫂秋菴四門博

士本阿鳳會插華簪奉

明詔仙九知道明年種壽堂對雨當歌幾同調葉落何

曾更上枝夢酣無奈終成覺卽是杯酒未爲貪分寸光

陰直須盜竹葉于人但有綠菊花向我常能笑攜燈出
門踏霜月高城嚴更已三蠶歸來和衣放倒頭枕畔烘
烘酒兵鬧夢中言語信口拈如步虛聲半天掉頰君寫
向花間吟不妨再落參軍帽

神絃曲侑花神

銅龍轉漏天雞叫宿霧侵衣曉寒悄地底春從天上來
弱柳含顰杏花笑拾魂粘夢癡不飛春風爾來爲阿誰
成句狂蜂憨蝶坐相識芳心展盡紅蕖蕤千聲彭肯花
腔鼓阿醋調絃阿双舞捉搦郎富又一場海如酒盞霞

如炬神來神來入寶莊千花萬花齊侑觴醉時與訴花
煩惱同我通明奏綠章

吳越王衣錦還鄉圖

翊業江東又溯東茗源舞鳳更飛龍兔兒枉說金牀上
袞冕居然石鏡中中朝間道勤供獻尙父加封願鐵券
辜負霜寒十四州甘心交臂慙昭諫故鄉父老望旌旂
擁纛從容願少休聞道紀年稱寶正依然小子說婆留
携持父子迎周道綺繡川原如畫稿鈴枕銅丸辛苦多
錦裘駿馬英雄老芒屨歌風亦有臺酒酣清淚欲沾衣

何如陌上花開日一曲春風緩緩歸

劉鷺峯照

暨陽酒人有劉髯方心直口生稜廉三杯入腹已兀兀
一藝得手常沾沾生徒環坐以十數左規右矩神明嚴
紛然投卷如落葉口講筆授無停淹矮壺深盞時自引
只愁瓶罄無人添悶來煮字不得啖往往索伴尋酒帘
槎枒肺肝得小豁雄談劇笑百不嫌髯年六十鬚未白
壯氣尙欲干人兼前歲田荆一枝折告靈涕泗悲僧謙
垂老支撐舊門戶益困瑣屑酬壺鹽坐令酒量比小劣

不敢張幟矜鋒鋌誰與巧工肖髯貌阿堵神到秋毫尖
雲根趺坐意獨往拾得紫芝隨意拈僵立石丈出奇致
並竿疎竹能修娥羽毛襍襍兩鶴子欲飛不飛神正恬
此時頗復思飲否我欲徑前祛手摻雨歇春波乍搖縠
花殘新綠剛壓檐蠶豆將肥接燕笋河豚已過饒江鮓
君山大好酒場戶接離倒載誰我鈐不見山邊松栢路
酒澆土上脣甯霑平原青州任臧否到口莫問酸與甜
古來聖賢皆寂寞青蓮此語堪針砭渴羌詩成舌轉燥
袖卷就髯求屬屨詩凡三百六十有六字請以一酌當

一縑

寄槎蕉窗自得圖

夜來夢入華胥庭曉起據几心神醒滿眼迷離墨雲湧
就中有客如傾聽頗疑清風當晝發或是快雨中宵零
捲書推窗忽長笑窓前蕉葉方青青

江龍門射虎圖

江君昂藏熊虎軀飛而食肉苞英圖慨慷指掌天下事
腰下欲嘯青昆吾胸次雪白天爲徒炯然此氣雄萬夫
願君養之以守柔神不外耗精與俱深山且自友麋鹿

斑奴何足當驅除會看馬首擁六纛十萬貔貅供指呼

顧侍護廣文蓉湖漁隱圖

我家住傍芙蓉湖蜻蜓小艇伴渚鳬蝦籠蟹簍足生計
風簑雪笠饒清娛夏來十里紅芙蓉綠雲一片烟平鋪
水清見魚任投餌釣竿真拂紅珊瑚老去情懷百無賴
問穀奚事方讀書求食無端類蛩蛸招隱且欲爲蜘蛛
掘沼經營種蓮藕花時倚杖聊踟躕自憐腰脚已非昔
那得洗足眠菰蒲眼前空明見此圖驚我霧眼揩模糊
雲水迷漫舊游處似曾相識煙波徒君今光然負璜書

磻谿小坐非真漁翻令根觸滄洲興累宵清夢還做廬
秋水方壯吾歸歟

錢懋溪撫琴圖

傍身置書卷籤帙燦精美名花與名香列厠別一几左
排古尊壘中想貯醪醴右乃位竹爐茶具紛可喜矮榻
方跏趺膝上眠絲綺一手按琴似應指欲彈未彈得琴
理一手臨爐炷松子引宮命操想心擬幕天席地了無
悶飯罷茶餘聊復爾老我披圖爲颺然那得書生福如
此昨夜南村桑苧翁琴書典盡釜無米

朱綠卿照

特立蒼官一何武彎環青士一何嫵性真刻露得風霜
意匠迷離足烟雨幽人或是綠衣郎鑒翠開窻吟古香
螺亭恰點平蕪淨黛岫遙排髻影當固知卿自用卿法
掃盡紅情歸檢押樹陰安穩儘高眠能否綠尊容一呷
寄荆溪友人

有人讀得書五車胸次灑灑如無書名理窺窻一輪月
好花當眼萬琲珠羣從兼之過未似風神想見瓊瑤如
可憐相聞不相卽兩沈水勢寬于湖

題吳湘浦松風水月圖

繪風宜繪松繪月宜繪水附物生精神空明出元理肖
貌宜肖月肖神宜肖風圓滿悟色相游行超化工先生
之圖妙于寄畫師點筆亦遊戲悅兮惚兮中有真聊爾
索解題詩人

陳笠漁明府照

丈人清節淵以寒塵外翛然出奇特吟風弄月有情仙
蒸藹華芝太古色伊誰比德祇修篁照映鬚眉盡老蒼
却對清漣思綠篠鴉鋤分種向瀟湘在手春風叅造化

琅玕千尺知無價長成鳳子已干霄轉盼龍孫更方駕
閒依松蔭拂雲根香裊茶烟酒乍溫有分一尊傾竹葉
古歡長與此君敦使君阿閣儀毛羽暫屈鸞棲不言苦
早識錢塘一葉清旋灤江國千花雨問寢承歡正及時
錦綉襍苗參差會移父母臺萊頌補註淇泉有斐詩

題朱瘦筠明經

光燦

久安圖

仲宣亦有言鵲鵲欺穉子但視若可得吾意亦自喜世
間安心法大抵皆爾爾唧唧穀穀八九頭相從蓬艾真
優游

養一齋詩集卷第二